

REBEKAH MBIET AÑWAN NDỌ CHRIST

Genesis 24:34-67

QYQHỌ UKPEP-ÑKPỌ 13

Eke Mkparawa

IKỌ IBUOT: “Ekem ini ndọ Eyen-erọñ, Ñwan Esie otim idem ebeñe Enye” (Eriyarare 19:7).

Ke Ufọk Rebekah

Ke ukpep-ñkpọ edem, ima ikpep ibaña nte eyen ufọk Abraham, Eliezer akakade ke isọñ Mesopotamia, man akada eyen añwan ọnọ eyen esie Isaac ke ndọ. Ke osimde ebiet emi enye akakade, ke mben obube mmọñ ke edem obio, enye osobo ye Rebekah. Ikebighike eyen eka esie eren ama ọsuhọre aka mben obube mmọñ onyũ ada mmọ ọnyọñ ufọk.

Iduhe ñkpọ emi mikanamke ke nditim ñkama mme isen owo emi eketode anyan ebiet edi, man ekop inemesit. Ema eyet mmọ ukot, enyũ enọ mmọ udia. Edi ke kpukpru emi Eliezer iketiñke kaña se isañ esie ekedide, emi okponde akan idem udia ke enyin esie. Enye ọdọhọ ete, “Ndiaha kaña tutu ndọhọ ikọ mi mma.” Ke ntre ke enye etiñ abaña Abraham, ete ufọk esie ye akwa inyene esie ye Isaac nte adia akpa esie.

Enyime

Ndien enye etiñ abaña isañ esie ye akam esie ke mben obube mmọñ ye ibọrọ akam esie. Edi akana nte mmọ ebọ unyime eto mbon ufọk Rebekah. Mmọ esọsọp efiọk ini kiet ete ñkpọ emi oto Ọbọñ, ndien edọhọ Eliezer ete, “Da enye ka; yak enye onyũ edi ñwan eyen ọbọñ fo, nte emi Jehovah ọkọdọhọde.” Ke ntak akwa idara, eyen ufọk emi ọduọ ke isọñ okpono Abasi. Idahaemi enye ọfiọk ete ke akpaikọ, Abasi ama anam imọ ikut unen ke isañ imọ. Enye ndien ada ediwak ñkpọ mbana silver ye eke gold ye edisine ñkpọ ọnọ Rebekah, onyũ ọnọ eka ye eyen eka Rebekah eren mme enọ ñko.

Se Rebekah Ekemekde

Ke usen ubọk, Eliezer oyom ndida Rebekah nnyọñ edi eka ye eyen eka eren esie edọhọ enye ete, “Yak eyen añwan etie kaña ye nnyin baba usen duop; ndien enye eyeka.” Edi eyen ufọk emi ama ọfiọk ete edieke imọ ibiatde ini, ke eyesọñ imọ idem eti-eti ndifiak, ndien ibọrọ esie ekedi, “Mbufo ekunam mi mbighi; koro Jehovah amanam mi ñkut unen ke usuñ mi, eyak mi ñka ñketiene ete mi.” Eka Rebekah okot eyen esie añwan onyũ ọdọhọ ete; “Nte afo onyime ndika ye owo emi?” Ana nte enye emek ke idem esie; ndien ubiat ini ikoduhe enye ọdọhọ ete, “Nyeka.”

Ke ndo-ndo oro, mbon ufọk Rebekah enọ enye edidiọñ, enyũ eyak enye etiene Eliezer ye mme nsaña esie eka ke isọñ Canaan, man ekedi ñwan Isaac, eyen eñwọñọ Abraham.

Ebana Ñwan Ndọ idem

Mkpanuen utọñ gold ye mbana itọñ ye mme ñkpọ mbana idem ye edisine ñkpọ eke enọde Rebekah mbemiso enye okosobo ye Isaac, edi mbiet mme enọ mfọn eke Spirit emi enọde ukpọñ eke oyomde ntọtuñọ ifiọk Abasi. Mme ediyet aran eke Spirit emi edepde ọduọhọ ukpọñ nte mbara enyọñ, enyũ edi ñko mme mbana idem Añwan-ndọ Christ. Mmọ edi nsọñ urua ñkpọ uto emi minyeneke ekọm urua emi Abasi ọnọde, inyũ iduhe ñkpọ eke ọdiọñde ukpọñ nte Spirit Abasi. Akwa uyama oduk ke ukpọñ emi Abasi ama akanyaña, eyet asana, onyũ añwam enye ndika iso tutu Abasi ọnọ enye baptism Edisana Spirit.

Ikot Mfin Emi

Anie edidọhọ, ye unyime, ye uko, ye mbuọtidem nte Rebekah ọkọdọhọde ete “Nyeka”? Spirit ke ọdọdọhọ ete, “ekunam mi mbighi” ye mmọ emi ekpefiakde edem, mme mmọ emi ekpenamde mmọ efen etre ndiyak idem nnọ Abasi ntọtuñọ-ntọtuñọ. Nte afo eyeduk ke ndibe ebiet ata Edikoñ? Nte afo eyeyime eyarade mme inyene Eyen Abasi enọ fi? Nte afo eyedọhọ ete, “Ami nyom ñkpọ mbana idem emi edinamde mi mbeñe idem ndidi ñwan ndọ Christ?”

Nte nnyin imekeme nditre ndibeñe idem? Nte nnyin iyedohọ ite, “Enye eyebighi usen duop,” mme “Enye eyebighi usen ition,” mme “Enye eyebighi usen kiet?” Ih ih! Ana nnyin idohọ, adaña ini emi Spirit akpakde “Nyeka, Nyeka.” Enye emi adade fi ke ñkañ ekeme ndidohọ ete, “Mkpọñ,” Edi Spirit odohọ ete “Mfin!” Ikot ke akaka iso. Ndusuk mmọ emi ema ekenyaña ibohọ kaña edinam esana; ndusuk iyohoke mmọ kaña ye akwa odudu emi otode enyọñ emi edide baptism Edisana Spirit. Nte afo eyeyom onyuñ ohọ mme enọ mfọñ Spirit emi man ekeme ndidohọ ete “Nyeka”?

Ñwan Isaac

Eyak nnyin ikpọñ mbon isañ ye ñwan ndọ ye edep esie ke isọñ Canaan, ika iso iso. Do ke ini mbubreyo, nnyin ikut nte Isaac asañade ikpọñ ke iñwañ, ye uwak ekikere. Enye emenere enyin esie ete ise, sese udim mme akamba-enañ-mbiomo ke edi ko nsan-nsan. Mmọ kesaña, kekpere. Enye okut Rebekah nte osuhorede ke enyọñ akamba-enañ-mbiomo. Edohọ ete edi ido ndusuk ebiet tutu osim mfin emi, ñwan emi awatde ke enyọñ akamba-enañ-mbiomo ndisuhore nda ke ntak ukpono, ke ini enye osobode ye eren owo ke usuñ. Rebekah ama obup abaña enye emi asañade ke iñwañ mme edi anie; ke ema eketiñ enọ enye ete ke edi Isaac, ke ata nsuhoridem ye ukpono enye emen ufuhọ ñkpọ esie ofuk idem emi ekedide ata akpan edisine ñkpọ ñwan ke ini oro. Enyin ikpọñ-ikpọñ ke ekenyene ndikut.

Ke ndo-ndo oro Eliezer etiñ kpukpru se enye akanamde ohọ Isaac. Esit Isaac ekenem didie ke ofiokde ete ke Abasi ama odioñ isañ eyen ufok oro. Ke ukpono, enye ada Rebekah oduk ke ufok-ohọ eka esie, Sarah. Rebekah akabare edi ñwan Isaac, ndien Isaac ama enye. Isaac ekeme ndidohọ mbaña enye ete, “Ima mi, afo emeye ama; ndo baba kiet iduhe fi ke idem” (Ikwọ Solomon 4:7).

Mme Ñwọrọnda-Idaha Ñwan Ndọ

Rebekah ama ekem ke kpukpru usuñ; enye ama enyene eti udohọ, ohọ ido, esin ifik, odot, ibopke iso, ibukke ibuk, onyuñ “akama isen owo ... isukke uyo” (1 Peter 4:9). Enye ohokpọñ ufok esie man okosobo ye ebe esie ke ata anyan idut. Isaac ama ohworo edi ndida enye. Jesus eyekpọñ ebekpo Esie ke Obio Abasi ke mme usen emi kiet edi mi, man edida ñwan ndọ Esie emi etied ebet Enye. Nte afo emebeñe idem?

MME MBUME

- 1 Nso idi ntak emi eyen ufok ekeyirede ndifiak nyọñ ini kiet ye Rebekah?
- 2 Enye akada nso odioñọ ete ke Abasi ohoro akam imọ?
- 3 Nso ekebup Rebekah? Nso ikonyuñ idi iboro esie?
- 4 Ke mme nso utọ usuñ ke Rebekah edi mbiet Ñwan-Ndọ Christ?
- 5 Anie edidi Ñwan-ndọ Christ?
- 6 Anie ekebem iso okut mme akamba-enañ-mbiomo nte edide?
- 7 **Tiñ ñkpọ baña edisobo Isaac ye Rebekah.**
- 8 **Siak mme idioñọ emi owutde ete ke edidi Ohọñ ekpere.**